

**Mahkamah Halang Penganjur, Orang Awam Memasuki Dataran Merdeka  
mStar Online  
April 28, 2012**

KUALA LUMPUR: Mahkamah Majistret telah mengeluarkan perintah menghalang penganjur Bersih 3.0 dan orang ramai daripada memasuki Dataran Merdeka pada hari Sabtu.

Majistret Zaki Asyraf Zubir telah membuat perintah itu pada kira-kira pukul 8.30 malam, Khamis, berikutan permohonan oleh pihak polis.

Ketua Polis Kuala Lumpur, Timbalan Komisioner, Datuk Mohamad Salleh berkata pihak polis mendapatkan perintah tersebut bagi mengekalkan keamanan dan ketenteraman awam.

Perintah mahkamah yang dikeluarkan itu melarang penganjur dan orang awam daripada berhimpun di Dataran Merdeka bermula tengah malam Jumaat hingga 1 Mei, katanya pada sidang media di sini, Jumaat.

"Sesiapa yang ingkar perintah mahkamah akan ditangkap dan didakwa di bawah Seksyen 188 Kanun Jenayah yang membawa hukuman denda maksimum RM2,000 atau enam bulan penjara atau kedua-dua jika disabit kesalahan," katanya kepada pemberita.

Selain daripada Dataran Merdeka, kawasan lain yang termasuk dalam perintah mahkamah tersebut ialah Jalan Sultan Hishamuddin, Jalan Raja and Jalan Kelab. Ini kerana jalan-jalan tersebut menghala ke Dataran Merdeka.

"Tidak semua jalan yang menghala ke Dataran Merdeka akan ditutup sepenuhnya pada Sabtu, melainkan keadaan memaksa kami berbuat demikian," katanya.

Hakcipta Terpelihara © 1995-2012 Star Publications (Malaysia) Bhd

Source:

[http://mstar.com.my/berita/cerita.asp?file=/2012/4/28/mstar\\_berita/20120427144351&sec=mstar\\_berita](http://mstar.com.my/berita/cerita.asp?file=/2012/4/28/mstar_berita/20120427144351&sec=mstar_berita)